

1555 ro fuere. His certa fede carentibus, Rex in suis amplissimis ædibus, quæ prope templum, unde nomen sortiti sunt, sitæ erant, degere permisit: certa, quibus viverent cum temporaria, tum perpetua ab eo, ac Patriarcha beneficia tributa, ut itinera tuta peregrinis redderent, & latrones, ac grassatores pro viribus insectarentur. Novem annorum spatio cum in eo instituto perseverassent, anno M. C. XXII. Honorii Pontificis Maximi, ac Stephani Patriarchæ auctoritate ordinis formula est constituta, albus amictus assignatus; mox Eugenii Pontificis tempestate rubra crux addita. Res inde Templariorum in imensum crevere, immanes congestæ Christianorum pietate, ac munificentia opes, quamplurima oppida addita, magistratus creati, cum certa pecuniæ vis quotannis in peregrinorum subsidium ab iis Hierosolymam mitteretur. Verum ex optimis initiis pessima exempla oborta exitium ordini attulere. Anno M. CCC. XII. a Clemente V. sublatus, bona magna ex parte divi Joannis militibus attributa. Alteri ordini ex ambobus mixto, quod hospitio exciperet, & pro religione armis decertaret, vir Theutonicus initium dedit, qui post Hierosolymam receptam in propriis ædibus Patriarchæ auctoritate divæ Genitricis, Virginis sacello constituto, Germanis sacra invisentibus loca, xenodochium instituit. Hunc quoque insignes plerique viri sumpto cum atra cruce candenti amictu, nobilitarunt. Hi, Hierosolymis amissis, in patriam reversi, a Sarmatis vocati, ut eis contra irruentes barbaros auxilio essent, Prussiam, christianæ religionis hostibus pulsas, occupavere. Atque is ordo, licet Prussia amissa, viget adhuc, Maximilianumque, Rodulphi Cæsaris fratrem, Magistrum temporibus nostris obtinuit.

*Theutonicorum Equitum origo.*

*Paulus Pont. infensus in Cæsarem.*

Ceterum dissidia inter Paulum Pontificem, ac Cæsarem Philippumque filium novos in Italia tumultus concivere. Ea licet tunc primum suboriri viderentur, jamdiu tamen etiam animis erupere, cum varias ob causas utrinque odiorum occulta semina alerentur, quæ jacta fuisse plerique dicerent, cum a Leone Decimo Sedis Apostolicæ nuntius ad colligendum beati Petri vectigal in Britanniam Caraffa missus, legatione perfunctus, in Belgium ad Cæsarem profectus, eumque in Hispaniam profectus, sua opera, si qua in re posset, delata, repulsam tulisset. Aucta vero, cum a Paulo tertio ad Neapoli-